



Leci Hendry

01.10.22 - 04.03.06

Leci Hendry ei naschius a Surrein, ils 1 d'october 1922. Ses geniturs ein stai Leci Antoni Hendry e Mariuschla nata Monn.

Sco quart affon da 10 eis el carschius si a Surrein en ina famiglia purila. Siu bab susteneva ils da casa cun lavurs da calger. Leci ha frequentau la scola a Sedrun. Sco giuven ha el empriu da scrinari tier il Gion Antoni Berther a Rueras. Ils treis frars Baseli, Tin e Leci han lu viviu ensemen e fatg il pur. Leci fageva denteren lavurs da scrinari, pli tard ha el luvrau bia onns sco um d'uaul tier la vischnaunca da Tujetsch. Era tiel runal da Surrein ha el fatg in grond survetsch. Per ses fargliuns fageva el lavurs da tener casa e mirava adina pil bien uorden. El era in um cuiet e retratg che schazegiava las lavurs exactas, aschia sco sias plunas lenna perfetgas documentavan quei. Sco ses dus frars ledis seteneva era el vid tradiziuns ed usits da pli baul. Tut niev e modern era suspect e vegneva refusau e criticau. «Nus vain adina fatg uscheia» era la tenuta fundamentala. Per els vess il temps duiu star eri e tut il svilup da nies temps malruasseivel fageva els malsegirs. Tonaton ha era nies aug Leci stuiu far bia experienzas novas ils davos onns. Bia niev ha tementau el ed el ei seretratgs bufatg adina dapli.

Pli baul accumpignava el ils nevs ad ina u l'otra tura cun skis sil Tgom. In da ses hobbys era naturalmein igl ira per izuns e ragischs d'ansauna. Sco nus vein udiu era igl aug Leci in rassig giuven cun bia humor e gudeva buna cumpignia.

Ils davos diesch onns ha el passentau ella casa s. Vigeli, nua che el ha gudiu ina buna e cordiala tgira ed ha astgau passentar bia bials ed emperneivels dis el ravugl dils cussadents. Las tgirunzas e conluvreras dalla casa s. Vigeli schazegiaven sia honzeliadad e siu humor. El ei staus engrazieivels per mintga atenziun ed il respect ch'el ha retschert.

Nus lein tener en buna memoria nies aug Leci, el ruaussi en pasch.

Silvio Schmid, Rueras